

Friday, March 7, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

CHAPCHAR KUT

Mizote Kut pui leh ngaihhlut ber Charchar Kut chu vawiin hian Mizoram hmun hrang hrang bakah State pawna Mizoram House-ah te hman a ni a. Kumin Chapchar Kut Thupui chu Zonun Zemawi Hawihhawmna tih a ni.

Chapchar Kut lawmna pui ber chu Aizawla Sipai Lammualah neih niin, Kut Pa Pu Lalduhoma chuan Mizo pi leh pu te kha mi hawihhawm, aia upa zah leh piangsual hmusit ngai lo an ni a ti a, chumi te thlah chu kan nih avangin tunlai thangthar te pawh, social media hrang hrangah te tawngkam hawihhawm hmang turin a chah.

Chief Minsiter Pu Lalduhawma chuan, Zofa hmun hrang hranga awmte chu taihmak chhuah lehzuah theuh turin a chah a, sorkar hnathawk zawng zawng pawhin rim takin hna a thawk mek tih a sawi a. Zofa zawng zawng ten an eizawnna theuhah, tih takzet an chhuah theuh chuan he hnam hi a ropui ang, tiin hnam ropuina tur chu taihmak a nih thu a sawi baw.

Pu Lalduhoma chuan Mizo pui leh pute chu aia upa zah mi an nihna chu an hawihhawmna mawi tak a ni tih a sawi a, tunlaiah office hna thawhnaah kum naupang zawkte chu hna sang thawk tam tak an awm tawh avangin hmanlai nun ang zawng zawng chu chhawm a rem lohna chen a awm tih a sawi a, chutihrualin a theihna chen chenah aia upa zahna chu lantir a pawimawh tih a sawi baw.

(Chapchar kut hi mizo ten kan hlut hle a, Aizawlah chuan a lawmna pui ber Sipai Lammualah nimin atang khan hman tan niin Chapchar Kut lawmna thawh hnihna hi vawiin khan Chief Minister Pu Lalduhoma'n khuallian niin a hmanpui.)

Kumin Chapchar kut thupui atan Zonun Zemawi - Hawihhawmna tih hman a ni. Chapchar Kut chhimtu mipuite pawh an thahnem in an hlim hle a, hnam lam leh hnam ziarang hrang hrangte entir niin zai leh lam hrang hrangte hmangin hun hman a ni.)

(Aizawl Sipai Lammual atangin Rodi Lalremruati Zote, Akashvani News Aizawl)

Lammuala hun hmanah hian hnam zia chi hrang hrang tarlan a ni a, cheraw kan a nih bakah hlado chham niin - hnam lam, pipu zai, lemchan, sechhun khuangchawi, pawnto leh chhawngghnawh te bakah hun hlimawm hrang hrang hman a ni.

Chapchar Kut hi mi zawng zawngin an hman theih nan, Mizoram sorkar chuan vawiin hi pisa chawlh atan a puang a, tun kar chhung khan sorkar

hnathawkte chu an hnathawhna hmunah hnam thuam inbel turin a lo ti tawh bawh a, hei hian ngaihhlut a hlawh hle a ni.



HEALTH MINISTER

Health Minister Pi Lalrinpuui chuan Mizo thalaite chu ruihhlo laka fihlim tum tlat turin a chah.

He thu hi nizan khan Lunglei Chanmari YMA Hall-a HPC MVA Cup a hawwna-ah a sawi a, Pi Lalrinpuui chuan Ruihhlo leh HIV/AIDS-in Mizoram a run mek chu a runthlak takzet tih sawiin, infiammite leh Mizo thalaite chu ruihhlo laka fihlim tum tlat tur leh mipat hmeichhiatna kawngah invawng thianghlim a, HIV/AIDS lakah fimkhur zel turin a chah a ni.

Social Welfare Minister ni bawh Pi Lalrinpuui chuan, infiamna chu mihring nuna bet tlat a nih thu leh Mizote chu a hnam ang zawng pawha infiamna ngaina tak an nih thu sawiin, hruaitu tha tak takte leh inkaihhraina tha tak zarah Mizoramah volleyball-a hmasawwna nasa tak hmuh tur a awm chho chu lawmawm a tih thu a sawi bawh.

HPC Lunglei MVA Cup 2025 hi March ni 6 atanga ni 13 inkar hian khelh tura ruahman a ni a. Mipa inelnaah Mizorama pro volleyball club panga - Chhinga Veng Spikers, Khawbel, Sihphir, TNT leh Tuichangral te an tel a, hmeichhiaah Mizorama pro volleyball club pathum - Bungkawn, Kolasib leh Luangmual te an tel a ni.



FIRE

Vawiin khan Khawzawl District-a Ngaizawla Pu Suansawmlangate chenna in chu bungrua engmah chuh hman lohin a kang ral. In hi a kan chhan hriat a ni lo.

Khawtlang mipuiin theihtawp chhuahin In kang hi thelh ni mah se, tui lamah harsatna a awm vangin a thelh mit mai theih loh ni a thu dawn a ni. Thenawm khawveng Inte hi theih tawp a kang kai lo tura ven niin, a kang kai lo a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar hi puan leh a ni ang.



SPEAKER

Mizoram Legislative Assembly Speaker Pu Lalbiakzama chuan, ASM (ASMCON) kum tin Inkhawmpui vawi 5-na leh India Association of

Paediatrics Surgeon (NEIAPSCON) inkhawmpui vawi 19-na, nimin leh vawiina neih chu Aijal Club-ah Khuallian niin a hmanpui.

Speaker chuan Paediatrics Surgeon-te hnathawh pawimawh zia te sawiin an hna pawimawh tak chu inpekna zawng zawng nena thawk turin a fuih a. Damlo te enkawl damna atan an thiamna te intathriam reng tur te, mihring anga midangte kan hriatthiamna leh lainatna nena damlo te enkawl a, damna thlen tu nih tum zel turin a chah bawk.

Speaker chuan Doctor te chu an dam chhunga midang tana rawn tlak, natna enkawl damna kawngah pawh thil thar, enkawlna tha zawk hmuchhuak tu nih tuma inzir reng turin a chah a. Natna enkawl damna kawngah thawktu nih duhtawk mai lovin natna laka kan lo invenna lamah pawh mipui zirtirna uar turin Doctor te chu a chah bawk a ni.

